

Premiere di "Promesa Falso" na New York a alcanza e reconocimiento universitario



ORANJESTAD (AAN): E documental "Promesa Falso", construi y graba na Aruba door di fundacion Switch Foundation, a wordo proyecta den e Foro di Migracion di e Universidad St. Francis, realiza na e ciudad di New York, Merca, dia 11 di Maart dilanti di un importante audiencia di studiantenan universitario.

E muestra di e documental a conta cu e participacion di Shamere McKenzie, sobreviviente di trafico di hende y CEO di e fundacion Sun Gate; Paula Nahr, productora y guionista di Promesa Falso. Tambe tabata presente doctor Miguel Llanes Saenz; director di St. Francis College; y doctor Reza Fakhari, vicepresidente di Strategianan Internacional di St. Francis College, y tambe vicepresidente di Amnistia International USA.

E audiencia universitaria a muestra nan impresion despues di a wak e documental, espacio den cual hopi a expresa nan reconocimiento ante e problematica humano, ademas di manifesta e voluntad di comparti e documental, y di involucra cupas antianan den Sun Gate Foundation, organismo dedica na educa y ofrece un oportunidad nobo di bida na e sobrevivientenan di explotacion sexual.

Paula Nahr, productora di e pieza audiovisual, a destaca cu e problema di e trafico di hende, plantea den Promesa Falso, ta un muestra di e industria criminal cu ta crece rapidamente rond mundo, locual ta converti e negoshi aki den uno multimillonario.

Ora cu e caba di wak e documental, doctor Reza Fakhari, den representacion di St. Francis College, a manifesta cu "e contenido di Promesa Falso ta educativo, convincente y yen di hechonan cu lo causa impacto den e hobennan y cu lo convence nan di no cay den e trampa di e traficantenan di personanan".

E audiovisual, ta conta cu e participacion di hobennan apasiona pa arte, cu ta interpreta e

testimonio real di Shamere McKenzie. Pa doctor Fakhari, e personahe di Shamere "ta represent'e, efectivamente, como un victima y sobreviviente".

Fakhari, a agrega cu e pieza audiovisual a obtene un gran respuesta di parti di e studiantenan di St. Francis College. "Nan a wak'e y a participar den e conversacion posterior na e proyeccion. Mi ta recomend'e altamente na otro institucionnan educativo pa e deteccion y alerta di e problematica", a bisa.

Educa pa concientiza tocante e autoproteccion

Un di e obhetivonan di e documental Promesa Falso ta educa e hubentud, pa motibo cu esaki ta e poblacion mas vulnerabel, pa medio di e material aki atractivo y rico den arte teatral y fotografico.

Den e sentido aki, e productora di documental, y fundadora di Switch Foundation, Paula Nahr, a extende su invitacion na e scolnan di Aruba pa haya un copia di e documental.

"Ta prudente recorda na nos poblacion cu dentro di poco hopi hoben lo ta viahando na otro paisnan pa studia. Ora di ta pafor di nan cas, nan por drenta den ambientenan vulnerabel. Ta hopi importante pa nan

wak Promesa Falso pa asina evita cu nan wordo trafica, y pa pone nan leu di relacionnan abusivo y di e 'loverboys', Nahr a agrega.

E audiovisual di 40 minuut produci na Aruba, ta wordo distribui di forma gratuito na tur fundacion y organizacion interesa, pa educa atraves di un caso sensibel di e bida real, y alerta tocante problematica mundial aki.

Pa adkiri un copia di e documental Promesa Falso, por contacta Switch Foundation; pa medio di nan canal di Youtube, nan rednan social, of mandando un email na nahrmedia@gmail.com.

